

Bosna i Hercegovina
Federacija BiH
Kanton Sarajevo
Skupština Kantona Sarajevo
n/p g. Elmedin Konaković, Predsjedavajući

ZASTUPNIČKO PITANJE I INICIJATIVA

Peta radna sjednica Skupštine Kantona Sarajevo

Pitanje resornom ministru i policijskom komesaru:

Ovih dana su mi građani skrenuli pažnju na postojanje, rekao bih alarmantnog broja ultradesničarskih i militantnih grupa i pojedinaca na društvenim mrežama koji pored vatrenog i hladnog oružja promovišu i određene ideološke sadržaje koji obiluju govorom mržnje i porukama vjerske i etnonacionalne mržnje, a čije su mete i neki zastupnici u ovoj Skupštini, kao i sami članovi vlade. Ja sam veliki pobornik slobode govora i vjerujem da svi imamo pravo izraziti svoje mišljenje na svojim računima, internet stranicama ili portalima, o bilo čemu i bilo kome, na bilo koji način, pa čak i najvulgarniji, kao što ste mogli svjedočiti u medijima. To je moje slobodarsko ideološko i političko uvjerenje. (Za navodni govor mržnje protiv nekih članova Glavnog odbora moje partije spreman sam disciplinski odgovarati, pa i biti izbačen iz takve partije.) Želim reći da nemam ništa protiv najgorih ličnih uvreda, bez obzira koliko neduhovite ili morbidne one bile, ali ako određene prijetnje ili ostrašćen govor mržnje dolazi od strane militantnih i naoružanih ultradesničarskih organizacija i pojedinaca – rađa se mala zabrinutost i pitanje u kojoj mjeri smo mi ovdje sigurni, tj. da li MUP KS može da garantuje našu sigurnost ovdje, u Kantonu Sarajevu, ili barem na potezu od zgrade MUP KS do ove zgrade. Moram priznati da sam u svjetlu trenutnih odnosa policije i ove vlasti počeo strahovati i pitati se da li je policija uopšte voljna to činiti (no to su samo, nadam se, moje paranoje).

Zato me zanima koliko je policija u KS ažurirana kada se o ovim savremenim pojavama radi, tj. da li odjel koji se bavi ovom problematikom svakodnevno skenira moguće terorističke i druge prijetnje na internetu (bez obzira da li se radi o zastupnicima skupštine, zvaničnicima i članovima vlade ili drugim javnim ličnostima i građanima).

Takođe me zanima gdje se i kako najefikasnije građani mogu prijaviti konkretne fizičke prijetnje i prijetnje smrću pošto sam i sam ovih dana bezuspješno pokušavao stupiti u kontakt sa nadležnima putem emaila.

INICIJATIVA: Da li bi resorno ministarstvo moglo organizovati određenu aktivnost, medijsku kampanju u svrhu edukacije, obrazovanja raznih generacija korisnika interneta o postupcima u ovakvim slučajevima?

OBRAZLOŽENJE:

Postoje mnogi pokazatelji da psihosocijalna klima u društvu nije na zadovoljavajućem nivou. Mene, kao zastupnika i građanina, zanima da li ova vlada i resor planiraju sistemski reagovati na moguću epidemiju ultradesničarskih tendencija i eskalaciju vjerske, etničke i nacionalne mržnje kojoj su izloženi i najmlađi.

Sarajevo, 27.02.2019. godine

Poslanik SDP BiH u Skupštini Kantona Sarajevo

